



AVTOR BENEVOLO LECTORI  
Salutem.



I cupis scire rationes mei propositi, Lector candide, quare post multos hanc conscripserim Arborem Iudiciariam, conscriptam vero in publicum emiserim, tibi eas propalabo. Notum est, requiri in eo, qui in altissimo Iuris Oceano nauigare vult, tria. Primò caput ferreum, secundò culum plumbeum, & tertio crumenam auream. Quia verò multi hoc tertio requisito, nimirum, aureâ carent crumenâ, ita vt ipsis impossibile sit, copiam librorum sibi comparare; qui in nostrâ facultate maximè cari sunt, ideoque in vsum eorum, qui plurimos libros coëmere nequeunt, hanc collegi Arborem Iudiciariam; vbi ex omnibus illis, qui de Processu scripserunt, & materias ad Processum Iudiciarium pertinentes tractarunt, excerpfi maximè necessaria & vtilia, superflua rescans. Ad hæc ex Mascardo de Probationibus, itemque ex Menochio de Præsumptionibus, ea, quæ semper & quotidie ferè occurrunt, collegi. Non solùm autem eis, quibus aurea deest crumena, hæc Arbor nostra prodest, verùm etiam illis, qui copiam librorum sibi comparare possunt, maximo est vsui. Si quis enim aliò ad amicabiles compositiones, *auff güetliche Taglaistung oder Tagfahrte* / votetur, atque copiam librorum ad manus habere, vel multis se onerare in itinere libris nequeat, is autem sciat, eo loci, in quem vocatur, fortè aliquid ratione Processus occurrere, hunc librum facile secum sumere poterit. Noli tamen tibi interim persuadere, me in dicta Arbore omnia præstare nixum fuisse: Scio enim, vnum hominem non omnia præstare posse; ansam tibi præbui, vt tu, si modò mediocriter diligens es, eam compleas & adaugeas.

Porro in allegando Speculo Marantæ scias me editionem Francofort. Anno 1586. secutum, itemq; in Petri Frideri tractatibus editionem Francofort. Anno 1597. imitatum esse, ne quis arbitretur, errorem ratione numerorum marginalium esse commissum. Si quæ fortè etiam errata Typographica irrepserunt, ea Lector candidus pro sua legalitate corrigat; temporis angustia præclusus Exemplar impressum perlegere, atque errata colligere non potui. Hisce vale, & meis laboribus frueri.

ARBORIS